



KEMENTERIAN WILAYAH PERSEKUTUAN
Aras G-7, Menara Seri Wilayah, Presint 2, 62100 Putrajaya
Tel: 03-8889 7888 Faks: 03-8889 7957
Laman web: www.kwp.gov.my

SIARAN MEDIA

UNTUK LIPUTAN MEDIA MASSA

ANAK-ANAK KOMUNITI PUTRAJAYA SERTAI PROGRAM BERKHATAN BERAMAI-RAMAI

PUTRAJAYA, 2 Disember 2017 – Seramai 400 orang kanak-kanak komuniti di Wilayah Persekutuan Putrajaya yang berumur di antara 4 hingga 12 tahun menyertai Program Berkhatan Beramai-Ramai anjuran Kementerian Wilayah Persekutuan dan Pusat Khidmat Masyarakat Putrajaya di Dewan Serbaguna, Kompleks Kejiranan Presint 9, di sini hari ini.

YB Datuk Seri Utama Tengku Adnan bin Tengku Mansor, Menteri Wilayah Persekutuan turut hadir memberi semangat dan meraikan kanak-kanak yang menyertai program ini sekaligus mengadakan kenduri doa selamat. Program ini adalah aktiviti tahunan Pusat Khidmat Masyarakat Putrajaya dengan kerjasama Kementerian Wilayah Persekutuan (KWP) dan Perbadanan Putrajaya. Semua peserta tidak dikenakan sebarang caj berkhatan serta ubat-ubatan yang diberikan. Ini adalah salah satu inisiatif yang diambil oleh Pusat Khidmat Masyarakat dan adalah peranan KWP untuk membantu meringankan perbelanjaan keluarga yang berpendapatan rendah dan sederhana dalam mengurangkan kos sara hidup mereka.

Selain itu, program ini juga dapat menyemai semangat kekeluargaan dan mengeratkan lagi silaturrahim dalam kalangan komuniti. Ini juga adalah sebahagian daripada tanggungjawab seorang pemimpin untuk memastikan kemaslahatan kesihatan kanak-kanak lelaki Islam khususnya di Putrajaya adalah terjamin seterusnya memperkukuhkan interaksi yang lebih mesra antara pemimpin dan komuniti.

Selain itu, YB Datuk Seri Tengku Adnan bin Tengku Mansor juga menyerahkan sumbangan kepada 1,150 orang pelajar sekolah dari keluarga yang berpendapatan rendah di bawah program Ceria Ke Sekolah anjuran Yayasan Wilayah Persekutuan. Para pelajar akan menerima baucer pakaian bernilai RM100 serta keperluan sekolah seperti alat tulis, beg sekolah dan lain-lain lagi. Melalui program ini, seramai 16,600 pelajar sekolah di Wilayah Persekutuan Kuala Lumpur, Putrajaya dan Labuan mendapat manfaat. Pemberian sumbangan ini adalah sebagai sokongan moral kepada ibu bapa dalam membantu menyediakan kelengkapan persekolahan anak-anak di samping memberi semangat dan keceriaan kepada para pelajar untuk ke sekolah pada tahun hadapan.

Disediakan oleh:

Bahagian Komunikasi Korporat
Kementerian Wilayah Persekutuan
2 Disember 2017